

A GUERRA

En Oriente Médio acabou-se a guerra, pero non chegou a paz. Hoxe máis que nunca deberíamos ser sensíbeis a situación dos países árabes e defender o lexítimo dereito a decidir o seu destino e a controlar as súas materias primas, en beneficio dunha nova orde internacional, na que a voz dos povos tradicionalmente inexistentes tivera o protagonismo central. Unha solución árabe ao conflito do Golfo é a única resposta lexítima, e un papel máis activo do mundo árabe na esfera internacional, dado o seu potencial político e económico, sería o desexábel. Non é casual, neste contexto, unha resposta tan brutal, aínda que hipocritamente amparada nunha actuación vergonzante da ONU, por parte dos USA e dos aliados da CEE: na nova orde internacional que se predica deben mandar os que mandaron sempre e os que xa nunca puideron dicir «esta boca é miña» deben aceptar as leis que se ditan desde o centro hexemónico. A esperanza como último recurso, o ánimo para un Terceiro Mundo «en pé», a solidariedade co povo árabe e o noso convencimento da obrigatória necesidade da libre autodeterminación de todos os povos para reconvertir a esta Planeta é a resposta a unha paz que pretenden instaurar ao «estilo americano».

OS INCÉNDIOS

Non pudemos ser no ano 1990 optimistas cos resultados do denominado «Plan contra incendios» da Consellería de Agricultura. As expectativas dun notábel incremento presupostario viron-se rapidamente truncadas pola filosofía do Plan: había máis atención á loita directa contra os incendios forestais que á prevención e recuperación das zonas queimadas no ano 89. Con esta disposición, os feitos non se deixaron sentir: o número de incendios aumentou e Galiza segue a ser unha antorcha permanente prendida durante todo o verán. Para este ano as previsións non son mellores nen moito menos: hai un importante presuposto, pero segue ser haber política preventiva e as actuacións da Administración autonómica van dirixidas maioritariamente as medidas de erradicación dos incendios e a sensibilizar (?) á opinión pública por medio dunha campaña publicitaria denominada «Galiza unida contra o lume», que terá o seu punto álxido na celebración de diversos concertos de rock. Pouco para pór fin ao maior delito ecolóxico que sofre o noso país e que, cun povo

dabondo sensibilizado ante a gravidade das súas consecuencias, é solidariamente denunciado ano tras ano por todos os sectores. A necesidade dun consenso social nesta problemática, facilmente conseguíbel, non debe restar denuncia e crítica ás actuacións políticas e responsabilidades gubernamentais, tanto da Xunta como do Goberno Español, que parecen resignados (ou cómplices?) á existencia dos incendios forestais todos os veráns no noso país.

OS RESÍDUOS SÓLIDOS URBANOS

Cando existe un momento favorábel á encetar campañas de xestión e recuperación de residuos sólidos (matéria orgánica, papel, cartón e vidro), cando as propostas sociais van encamiñadas á divulgar os beneficios sociais da recuperación dos materiais facilmente reciclábeis, surxe a resposta da COTOP de defensa da eliminación do lixo por medio de incineradoras e o, demostrado, ineficaz sistema dos «vertedeiros controlados» que non veñen senon a xustificar os perxudiciais vertedeiros incontrolados que pululan por todas as cidades, estradas e lugares. A aposta polo reciclado é a saída a unha situación caótica de xestión de RSU e unha verdadeira proposta para a recuperación de espazos absolutamente degradados. Reciclar o que desbotamos é camiñar cara a unha moi recomendábel nova mentalidade diante do despilfarrador uso cotidiano de consumir o máis posíbel, sen valorar nen custes sociais nen custes ecolóxicos.

SEUS SEMPRE

Ramón Vilalta López, António Fernández Domínguez, Xoan R. Rey Gómez, Alberte Regueiro Franco, Enrique Niño Ricoi, Xesús Pereiras López, Carlos Vales Vázquez, Ramón Varela Díaz, Xosé M. López Ciprián e Manuel Soto Castiñeira aportaron alimento textual. As ilustracións son de 106 Caricaturas contemporáneas (Museu do Humor, Concello de Fene). As fotos correron a cargo de Manuel Graña, Carlos Silvar, Xurxo Lobato, Xesús Pereiras e Paco Brei. O noso agradecemento ás revistas Integral, MOPU e Correo da Unesco e a Fauna ibérica pola utilización das súas ilustracións e fotografías. A coordinación da publicación fixemo-la Antón Prieto, Carlos Silvar, Xosé M. López Ciprián e Xosé María Torné.

Depósito Legal: C-913-1986.